

Wednesday, April 15, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



MNF PRESS CONF

MNF General Headquarters hruaitute chuan vawiin khan Aizawl PressClub-ah thuthar thehdarhtute kawmin, ZPM sorkarin Mizoram Universal Health Care Scheme (MUCHS) a kalpui mek danah thup rûk a tam a, mi nawlpui ban phak a ni lo bawk a ni, an ti.

MNF General Headquarters general secretary Dr. Lalrinzuali chuan ZPM sorkarin MUHCS a kalpui danah health care scheme dangin a huam ve loh, mipui nawlpuite tan ban phak loh anih avangin tuna kalpui mek dan hi awmze nei lo niin a sawi a; MUHCS hi a funna lian tak, a tak erawh te reuh te ni si a ni, a ti.

Health Scheme engmah nei ve lo, a mamawhtu tak tak, contributory beneficiaries inziaklut an tlem em em chhan hi inziah luh man a san em vang niin Dr. Lalrinzuali chuan a sawi a; Kohhran hote hialin an kohhran mi leh sa, inziah luhna nei lote puih an inhuam thu an auchhuahpui ta hial chu MUHCS hlawhchham zia lanna a ni a, sorkar tan thil zahthlak tak a ni, a ti bawk.

Dr. Lalrinzuali chuan sorkar hian langtlang takin indawrna a kalpui lo a, phai lam leh Mizoram chung ngeiah pawh damdawi-in thenkhat chu a rûka inremna siampuiin, an inremna chu Assembly House-ah meuh pawh MLA ten an zawt chhuak zo lo tih a sawi bawk.



MPCC PRESS CONF

Mizoram Pradesh Congress Committee MPCC general secretary Rosiamngheta, AMC corporator kalchhuakta chuan vawiin khan Aizawl Press Club-ah thuthar thehdarhtute kawmin, AMC-ah Congress Party-in sorkarna an siam a nih chuan Aizawl khawpuia ran vulhna khuahkhirhna dan hman mek chu mipui tan zangkhai leh awmze nei zawka hman a nih theih nan hma an lak dawn thu a sawi.

Pu Rosiamngheta chuan Aizawl khawpuia vawk vulh khapna dan chu AMC-a ZPM Corporator-te motion putluh a nih thu a sawi a; MNF kaihhruai AMC sorkarin Aizawl khawpui chhunga ran vulh khap tlatna dan a lo siam hi zangkhai zawk leh awmze nei zawka hman anih theih nan an ennawn dawn tih a sawi.

Pu Rosiamngheta chuan municipal sorkar chu state sorkarin a duh duha a thunun theih loh, mahnia rorelna leh thuneihna nei a nih thu a sawi a; Aizawl khawpui nun awmze neia a subject chan hmanga enkawl mai tur a ni a, party thenkhatten state sorkar lai agency pakhat deuhthaw ang maia an ngai chu a dik lo, a ti.



I&B

Ministry of Information & Broadcasting hnuiaia Press Information Bureau bultumin vawiin khan Aizawl Press Club-ah Chhiarpui 2027 buaipuitu Directorate of Census Operations leh State Nodal Department - GAD hotuten thuthar thehdarhtute an kawm a; Mizoram mipuite chu chhiarpui neih meka thawktute tha taka thawhpui tur leh chhiarpui titute ID Card enfiah hmasa thin turin an chah.

Directorate of Census Operation director Pu Vinod a chuan, chhiarpuia mahnia inziahluna online chu vawiin thleng hun hawn niin, naktuk atangin chhiarpui atana Houselisting & Housing (HLO) kalpui tan a nih dawn thu a sawi a; naktuk atanga HLO kalpui turah chhiarpui buaipuitute tha taka thawhpui tura mipui chahin, chhiarpui atana zawhna an rawn neihte pawh tha taka chhang turin a ngen a ni.

Chhiarpuia hian a thawh hnihnaah mihring chhiar tur a nih thu leh nakkum lamah kalpui tur a nih thu an sawi a, mihring chhiarnaah hian ram chhunga khawsa mi tupawh, India mi leh sa ni lote pawh chhiar tel vek an nih dawn thu leh, Mizoram mi leh sa, state danga hna emaw, zirna emaw avanga awmte chu an awmna state ah theuh chhiar tel an nih dawn thu an sawi bawk. Census.gov.in ah mahni a inziahlun theih a ni.

